

تبریزده 15 اۆلکه‌نین حضورینن ایپک یولو ییغینجاغی ایشه باشلادی

ایپک یولو ایجلاسی‌نین ایکینجی بین‌المیللی ییغینجاغی اون‌بئش اۆلکه‌دن 800 تاجیر و بازرگانین حضورینن تبریزین پتروشیمی تالاریندا ایشه باشلادی.

شرقی آذربایجان اوستاندارین برنامهریزلیق موعاوینی بو ییغینجاغین باشلاماسی حاشیه‌سینده فارس خبرنیگارینن دانیشیقدا 15 اۆلکه‌دن دولتی مقاملار و تاجیرلر و تولید ائلیه‌نلرین بو ییغینجاغدا اولماقلاریندان خبر وئردی. او هابئله 800 داخیلی صنعتی و بازرگانى واحیدین بو ییغینجاغدا حاضر اولماقلاریندان خبر وئردی و آرتیردی: بو ییغینجاغدا اولانلار 10 تخصصی پانلده تیجاری موداکیره‌لر ائلیه‌جاقلار. مسجدی خبر وئردی کی ایپک یولو ییغینجاغیندا موشاریکت ائدن هیأتلری ال ایشلری نومایشگاهى، خاریجی سرمايا قویما شهرکی و آراز آزاد منطقه‌سیندن گؤروش ائلیه‌جاقلار. او بو ییغینجاغین اصلی هدفینی شرقی آذربایجانین بین‌المیللی رابیطه‌لرین گئنیشلندیرمک عنوان ائله‌یب آرتیردی: عین حالدا چالیشیروق اوستاندا تولید اولان محصوللارا تازا بازارلار تاپاق و لازیم اولان دستگاهلاری ییغینجاغدا اولان اۆلکه‌لردن آلاق. مسجدی ایپک یولونون احیا ائله‌ماغین بو ییغینجاغین ایری موهوم هدفلریندن ساییب دئدی: ایپک یولو ایقتیصادی جنبه‌سیندن سونرا فرهنگى جهتندن ده چوخ اهمیتی وار و بو یولون احیاسی میلّتلر آراسینداکی رابیطه‌یه کؤمک ائدر. ایپک یولونون قاباقکی ایکى ییغینجاغی ترکیه‌نین «ترابزون» شهرینده قورولوب و ایکینجی ییغینجاغدا شرقی آذربایجان هیأتی‌نین پیشنه‌هادی اساسیندا، بو ییغینجاغین اوچونجو دؤره‌سی تبریزده اولدو.